

Penshonadonan di PCN riba e islanan BES no tin mester mas di ‘Prueba di ta na bida’

Entrante 2020 personanan ku derechi di penshun ku ta biba riba e islanan BES no mester entregá un ‘Prueba di ta na bida’ (attestatie de vita) anualmente mas na Pensioenfonds Caribisch Nederland (PCN).

E ‘Prueba di ta na bida’ akí tabata nesesario te na e momentunan akí pa evitá ku despues di fayerimentu di un miembro partisipante, lo a sigui paga e pago di penshun un tempu muchu largu. Den e kaso ei tabata nesesario pa kobra e plaka ei bèk atrobe di sobrevivientenan i esei tabata un situashon indeseabel. Pa evitá esaki, PCN tabata pidi su penshonadonan tur aña pa pasa trese nan ‘Prueba di ta na bida’ na ofisina òf manda esaki.

Desde e aña akí PCN por wak den atministrashon básiko riba e islanan BES i asina simplemente por saka afó kon ta pará ku su penshonadonan. Esaki ta nifiká ku penshonadonan na Boneiru, Sint Eustatius i Saba no ta risibí mas e petishon pa entrega e prueba di ta na bida.

Esaki sinembargo no ta konta pa personanan ku derechi di penshun ku ta biba pafó di e islanan BES. PCN ta pidi nan e aña akí atrobe bolbe manda nan ‘Prueba di ta na bida’ pa PCN mas pronto posibel via pòst òf via e-mail. Entretantu a manda e petishonnan.

PCN *no* ta risibí outomátikamente un notifikashon for di e atministrashon básiko ora un penshonado partisipante fayeré. Pa e motibu ei ta importante pa sobrevivientenan mes mèldu esaki mas pronto posibel na PCN. PCN por para e pago di penshun e ora ei mesora i regla eventual penshun di sobreviviente i kompensashon di duele (smartengeld).